



Sud Bosne i Hercegovine
Суд Босне и Херцеговине

Broj: S1 3 Iž 043907 22 Iž
Sarajevo, 19.09.2022.godine

Sud Bosne i Hercegovine u Sarajevu, u apelacionom vijeću sastavljenom od sudija Zvezdane Antonović kao predsjednika vijeća, Mirsade Džindo i Srete Crnjaka, kao članova vijeća, odlučujući o žalbi žalitelja Hrvoja Orlovića, ..., T., izjavljenoj protiv odluke Centralne izborne komisije Bosne i Hercegovine, broj: 06-1-07-1-3-1054/21 od 02.06.2022.godine, na nejavnoj sjednici održanoj dana 19.09.2022. godine, donio je ovo

R J E Š E N J E

Žalba se odbacuje kao neblagovremena.

O b r a z l o Ź e n j e

Odlukom Centralne izborne komisije Bosne i Hercegovine, broj: 06-1-07-1-3-1054/21 od 02.06.2022.godine žalitelju je izričena novčana kazna u iznosu od 500,00 KM zbog nepodnošenja izjave o imovinskom stanju u roku od 30 dana od dana prestanka mandata na koji je izabran.

Protiv ove odluke žalitelj je izjavio žalbu u kojoj navodi da nije zaprimio nikakav poziv vezano za izjašnjanje o razlozima nepodnošenja izjave o imovinskom stanju. Navodi, da isti nikad lično nije zaprimio, te da se isto može potvrditi usporedbom njegovog potpisa na ličnim dokumentima i na dostavnici. Nadalje, navodi da građani imaju pravo biti informisani o imovinskom stanju svih izabranih dužnosnika, ali misli da bi zbog značajnih promjena svog imovinskog stanja u 2021. godine, drugi politički dužnosnici zloupotrijebili njegovu izjavu. U prilogu žalbe dostavlja svoje i supruzino imovinsko stanje. Od Suda traži da se oslobodi plaćanja kazne obzirom da poziv za dostavu izjašnjenja nije zaprimio, razloge nedostavljanja izjave o imovinskom stanju, te trenutnih kreditnih obaveza ili da mu se kazna umanjí na minimalnu uz mogućnost plaćanja na rate.

Centralna izborna komisija Bosne i Hercegovine je u odgovoru na žalbu predložila da se žalba odbaci kao neblagovremena ili odbije kao neosnovana.

Žalba je neblagovremena.

Odredbom člana 6.9. stav 1. i 2. Izbornog zakona Bosne i Hercegovine („Sl.glasnik BiH“ broj 23/01, 7/02, 9/02, 20/02, 25/02, 4704, 20/04, 25705, 25/05, 65/05, 77/05,

11/06, 24/06, 32/07, 33/08, 37/08, 32/10, 18/13, 7/14,31/16,41/20,38/22 i 51/22) je propisano da se žalba na odluke Centralne izborne komisije Bosne i Hercegovine podnosi Apelacionom odjeljenju Suda Bosne i Hercegovine, putem Centralne izborne komisije Bosne i Hercegovine, u roku od dva dana od dana prijema odluke.

U konkretnom slučaju, uvidom u spis predmeta apelaciono vijeće ovog Suda je utvrdilo da je gore navedena odluka CIK-a BiH zaprimljena od strane žalitelja dana 02.08.2022.godine, a da je žalba uložena dana 05.08.2022.godine, dakle nakon isteka utvrđenog roka za podnošenje žalbi.

Kod ovakvog utvrđenja ovo vijeće nije posebno cijenilo ostale žalbene navode, obzirom da nisu od uticaja na drugačije rješavanje.

Obzirom da je navedeni rok do kojeg je žalitelj bio dužan izjaviti žalbu prekluzivne prirode to je, imajući u vidu navedene relevantne odredbe Izbornog zakona BiH („Službeni glasnik BiH“, broj 23/01 do 51/22), Sud je odlučio kao u dispozitivu.

Iz navedenih razloga vijeće Apelacionog odjeljenja ovog suda nalazi da je žalba neblagovremena, pa je istu analognom primjenom člana 52. stav 1. Zakona o upravnim sporovima Bosne i Hercegovine („Službeni glasnik BiH“, broj: 19/02, 88/07, 83/08 i 74/10), valjalo odbaciti.

**PREDSJEDNIK VIJEĆA
S U D I J A**

Zvezdana Antonović